



Izborni budilnik



**Glasaj da ne
postaneš stranac!**

www.izbornibudilnik.se

Zašto izaći na izbore?

5 najvažnijih razloga za glasanje

1. Samo dijaspora može promijeniti BiH

Nakon što smo se uvjerali da se svi akteri u političkoj areni u BiH već godinama vrte u krug (što očito odgovara mnogim političarima) i da se jedini napredak očituje kroz nametnute mjere Visokog predstavnika, postalo je jasno: samo dijaspora može promijeniti BiH. Mi živimo izvan sitnih dnevno-političkih igara u BiH i vidimo iz svoje perspektive cjelinu puno bolje nego oni koji žive u zemlji. Mi smo stekli znanje i toleranciju, smirenost i mudrost da možemo stvarno pomoći svojoj zemlji, nas u dijaspori ima toliko da možemo odlučiti ishod svake političke bitke. Potrebno je samo velikim brojem glasova iz dijaspore pokazati političarima u BiH da moraju računati na još jednu snagu i zadovoljiti kriterije koje ona postavlja. **Promjena je moguća, ali bez glasa dijaspore je neće biti.**

2. Svaki glas se broji

Iskoristite svoje pravo glasa i odradite svoju građansku dužnost. Na izbore za predsjednika RS 2007. odazvalo se 411.023 birača. Izabran je Rajko Kuzmanović sa 169.863 glasa. U dijaspori živi preko 700.000 građana koji mogu ostvariti pravo glasa u RS. Da ih se samo jedna četvrtina odazvala na ove izbore, to bi bilo 175.000 glasova - dakle, preko 5.000 glasova više od onog što je dobio pobjednik. **S tim odzivom dijaspora ima mogućnost da samostalno izabere bilo koga za predsjednika.** Na lokalnim izborima je mogućnost da se utiče na rezultate još bolja.

3. Glasanje je minimum koji možemo uraditi za svoju zemlju

Od građana BiH se u jednom trenutku tražilo da se s puškom u ruci bore za opstanak svoje zemlje. Od Vas koji danas živite u dijaspori traži se puno manje - da pošaljete dva pisma u BiH kako bi Vaš glas promijenio stanje u zemlji. Je li to previše?

Patriota nije onaj ko priča da voli svoju zemlju, nego onaj ko za nju nešto učini.

4. Nikad ne reci nikad

Da nam je neko rekao u doba Ante Markovića da ćemo danas živjeti u Švedskoj, bio bi ismijan. A evo nas tu i čini nam se da ćemo ostati vječno. Postoji film koji se zove *Nikad ne reci nikad*. Niko od nas ne zna kad nam i zašto Bosna i Hercegovina može ponovo zatrebati. A kakvu ćemo je zateći, zavisi prije svega od nas. **Glasanje je danas jedini način borbe za bolju BiH.**

5. Iz inata svima onima koji nas žele isključiti iz života naše zemlje

Ako Vi ne želite učestvovati u odlučivanju, o Vašoj sudbini će odlučivati i oni koji su Vas protjerali. Ako ne glasate, može Vam se dogoditi da izgubite državljanstvo, imovinu u BiH, da plaćate dodatne poreze i boravišne takse prilikom posjete svojoj zemlji. Da li to stvarno želite?

I ne zaboravite: **Ko ne glasa, nema pravo da se žali.** Onaj ko nije učinio ni najmanji napor da popravi stanje u svojoj zemlji ili svojoj lokalnoj zajednici (dakle, nije čak ni izašao na izbore), nema moralno pravo da se žali.

Kako izaći na izbore?

Za građane koji žive u dijaspori važe posebna pravila za glasanje na izborima. Obavezna je takozvana aktivna registracija. To znači da se za svake izbore mora poslati prijava Centralnoj izbornoj komisiji BiH i tako steći pravo izlaska na izbore. Cijeli proces se odvija u četiri koraka:

Korak 1

Vaša odluka da se registrujete za Parlamentarne i Predsjedničke izbore u BiH 2010.

Novi Izborni zakon BiH predviđa permanentan proces registracije građana koji žive izvan BiH za glasanje na izborima u BiH. To znači da ne morate čekati nikakav poziv Centralne izborne komisije za registraciju, nego je možete obaviti odmah.

U međuvremenu, ako već nemate, izvadite ličnu kartu ili pasoš BiH. Tako ćete automatski dospjeti na Centralni birački spisak i olakšati registraciju za izbore. Zato je korak 1 samo Vaša odluka da se registrujete za Parlamentarne i Predsjedničke izbore u BiH 2010.

Korak 2

Birači se na zakonom propisani način registruju za izbore ili potvrđuju svoju prethodnu registraciju.

Osobe koje prvi put glasaju poštom moraju provesti kompletan postupak registracije (detaljno opisan na našoj web stranici), a osobe koje su glasale na prethodnim izborima moraju samo potvrditi svoju prethodnu registraciju.

Prijave se dostavljaju Centralnoj izbornoj komisiji BiH putem pošte ili faksa prema uputstvu sadržanom na obrascu prijave. Ostali detalji su dostupni na web stranici www.izbornibudilnik.se

Korak 3

CIK šalje birački paket za glasanje putem pošte svim registrovanim biračima.

Birački paket za glasanje putem pošte sadrži: obrazac sa ličnim podacima birača sa uputama kako glasati, glasačke listiće koji se izdaju za izbornu jedinicu za koju je birač registrovan da glasa putem pošte na Izborima 2010. godine, kovertu za glasačke listiće (bijelu kovertu sa crnom prugom) i povratnu kovertu sa odštampanom adresom Centralne izborne komisije u BiH.

Korak 4

Birači glasaju, pakuju birački paket i vraćaju CIK BiH u roku navedenom na uputstvu.

U kovertu koja se šalje CIK BiH (sa odštampanom adresom za povrat), treba staviti slijedeći sadržaj: zalijepljenu kovertu za glasačke listiće (bijela koverta sa crnom prugom koja osigurava tajnost glasanja), obrazac sa ličnim podacima koji ste dobili u biračkom paketu i kopiju jednog od važećih identifikacijskih dokumenata sa fotografijom.

Nakon pakovanja na povratnu kovertu se stavlja poštanska marka i šalje se poštom na unaprijed odštampanu adresu izborne komisije u BiH.

Kad ovo obavite, možete biti jako zadovoljni, jer ste učinili nešto za svoju zemlju. A da Vas podsjetimo **Patriota nije onaj ko priča da voli svoju zemlju, nego onaj ko za nju nešto učini.**

Telefon: 0707 645 710

Treba li pomoć?

Zašto je pokrenut projekt

Građani BiH koji žive u Švedskoj iz godine u godinu sve manje su glasali na izborima u BiH. Za to postoji više razloga, ali je činjenica da cijela BiH zbog toga trpi neprocjenjive štete. Organizacije koje okupljaju građane BiH u Švedskoj zato su odlučile da se udruže i pokrenu projekt **Izborni budilnik** koji je preokrenuo ovaj negativni trend. Projekt je prvobitno počeo sa radom 01. septembra 2007. i trajao do održavanja Lokalnih izbora u BiH u oktobru 2008. Rezultat projekta je bio znatno povećanje broja birača iz Švedske. Zato su iste organizacije odlučile da i ove godine nastave projekt, kako bi povećali broj birača za Parlamentarne i Predsjedničke izbore u BiH u oktobru 2010.

Koji su zadaci projekta

1. Da informiše građane BiH koji žive u Švedskoj o mogućnostima glasanja na izborima u BiH i da ih potakne da to i učine.
2. Da pomogne našim građanima u Švedskoj da se registruju i glasaju na izborima u BiH.
3. Da iskoristi sva zakonom predviđena sredstva da utiče na promjene Izbornog zakona koje bi omogućile da veći broj građana BiH koji žive u dijaspori glasa na izborima u BiH.

Ko stoji iza projekta

Savez BiH udruženja u Švedskoj (www.bhsavez.org)
Bosanskohercegovački savez žena u Švedskoj (www.bihsavezzena.com)
Islamska zajednica Bošnjaka u Švedskoj (www.izb.se)
Bosanskohercegovački savez omladine u Švedskoj (www.bhuf.org)
MDD Merhamet Švedska (www.merhamet.nu)
Savez Banjalučana u Švedskoj (www.banjalucani.org i www.blsavez.org)
Muslimanski omladinski savez u Švedskoj (www.bemuf.org)
Bosansko-švedski savez žena u Švedskoj
Savez logoraša BiH u Švedskoj

Projekt je otvoren za pridruživanje svih organizacija i pojedinaca koji BiH smatraju svojom domovinom. Projektom upravlja Koordinacioni odbor sastavljen od predstavnika svih organizacija koje stoje iza projekta, a operativne zadatke obavlja voditelj projekta.

Šta Izborni budilnik može učiniti za Vas

Dakle, ako Vam treba bilo kakva pomoć pri registraciji ili Vam je na bilo koji način uskraćeno glasačko pravo, nazovite Izborni budilnik ili pošaljite e-mail. Ili kako bi kraće rekli:

Nisi sam protiv svih, uz tebe je



Izborni budilnik

www.izbornibudilnik.se

info@izbornibudilnik.se

Telefon: 0707 645 710